

NË EMËR TË POPULLIT

GJYKATA THEMELORE NË GJAKOVË—Departamenti i përgjithshëm, gjyqtarja e vetme gjykuese Diana Sina, me procesmbajtësen Lamije Kuqi, sekretare juridike pranë kësaj gjykate, në lëndën penale kundër të akuzuarit Y. M. nga Gjakova, i akuzuar sipas aktakuzës të Prokurorisë Themelore në Gjakovë, me numër PP/II.nr.235/2015, të datës 27.03.2015, për shkak të veprës penale vjedhja e shërbimeve komunale, nga neni 320 të KPRK-së, pas mbajtjes së shqyrtimit fillestar me datë **21.04.2016**, në prezencën e Prokurorit të shtetit Ramiz Buzhala, të akuzuarit, në të njëjtën datë mori dhe publikisht shpalli këtë:

A K T G J Y K I M

I akuzuari **Y. M.**, nga i ati R. dhe e ëma B. e gjinisë B., i lindur me ... në Prishtinë, e tani me banim në Gjakovë, ka të kryer kualifikimin superior-fakultetin dega e artit, i pa martuar, i pa punë, i gjendjes së dobët ekonomike, shqiptar, shtetas i R Kosovës.

Ë S H T Ë F A J T O R

Sepse: Në mes datës së pavërtetuar e gjer me 05.11.2014, qiramarrës ne ish barnatoren bujqësore rr. “V. F.”: nr... ne Gjakovë (prone e B. B.), me qëllim që vetit ti sjell fitim pasuror të kundërligjshëm, ka shfrytëzuar në mënyrë të paautorizuar energjinë elektrike- në kundërshtim me rregullat dhe kushtet e përgjithshme për furnizim me energji, ashtu qe mbrapa njehsorit elektrik nr. 62226579 përmes kabllor është lidhur direkt në rrjetin elektrik dhe ka montuar ndërprerësin 1,0,2 me çka ka anashkaluar dhe penguar regjistrimin e shpenzimit të energjisë elektrike, me ç’rast të dëmtuarës KEDS në Gjakovë i ka shkaktuar dëm material në vlerë prej 1.572.01 euro

-me çka ka kryer veprën penale vjedhja e shërbimeve komunale, nga neni 320 të KPRK-së.

Gjykata në bazë të nenit 4,17,41,46,49,50,51,52 par.5, 73, dhe nenit 320 të KPRK-ës, si dhe nenit 365 të KPPK-ës, i shqipton;

DËNIM ME KUSHT

Dënim me burgim në kohëzgjatje prej **3 (tre) muajve**, dhe dënim me gjobë në shumë prej **100 (njëqind)Euro**, të cilat dënime nuk do të ekzekutohen nëse i akuzuari brenda kohës së verifikimit në afatin prej **1 (një) viti**, nuk kryen ndonjë vepër tjetër penale.

Detyrohet i akuzuari që të paguaj shpenzimet e paushallit gjyqësor në shumë prej **30 Euro**, në afat prej 15 ditësh, nga dita e plotfuqishmërisë së këtij Aktgjykimi.

E dëmtuara KEDS-Divizioni i rrjetit Distrikti në Gjakovë, për realizimin e kërkesës pasurore juridike udhëzohet në kontest civil.

A r s y e t i m

Prokuroria Themelore në Gjakovë, pranë kësaj gjykate, ka parashtruar aktakuzën PP/II.nr.235/2015, të datës 27.03.2015, kundër të akuzuarit Y. M. nga Gjakova, për shkak të veprës penale vjedhje e shërbimeve komunale, nga neni 320 të KPRK-së. Prokurori i shtetit Ramiz Buzhala, në shqyrtimin fillestar ka qëndruar në tërësi pranë aktakuzës kundër të akuzuarit Y. M., andaj i ka propozuar gjykatës që i njëjti të shpallet fajtor dhe të dënohet sipas ligjit.

I akuzuari Y. M. deklaron se e pranon fajësinë ashtu siç është përshkruar në dispozitivin e aktakuzës, duke cekë se në këtë dyqan kam qenë si qiramarrës dhe për një periudhë të shkurtë kohore, më pak se një muaj, mirëpo është e vërtetë që punëtorët e autorizuar të KEDS gjatë kontrollit të bërë kanë konstatuar këtë gjendje faktike, prandaj për një periudhë shumë të shkurtë kohore është e pa mundur që unë të kem shkaktuar të dëmtuarës KEDS dëm në vlerë prej 1.572.01 Euro, shton se jam i pa punë, jam në gjendje të dobët materiale, për herë të parë paraqitem në Gjykatë për një veprë të kryer penale, prandaj i propozoi gjykatës që të merr parasysh këto rrethana me rastin e shqiptimit të dënimit.

Duke u deklaruar lidhur me mendimin lidhur me pranimin e fajësisë nga ana e të akuzuarit, prokurori i shtetit ka deklaruar se nuk e kundërshton pasi që i akuzuari ka pranuar fajësinë me vullnet dhe vetëdije të plotë dhe i njëjti ka kuptuar natyrën dhe pasojat e pranimit të fajësisë dhe se pranimi i fajësisë u bë në mënyrë të vullnetshme dhe se pranimi mbështet në faktet dhe provat që përmban aktakuza.

Në shqyrtimin fillestar gjykata ka vërtetuar këtë gjendje faktike:

Në tërësi u vërtetuar se i akuzuari Y. M., në mes datës së pavërtetuar e gjer me 05.11.2014, qiramarrës në ish barnatoren bujqësore rr. “V.F.”: nr... në Gjakovë (prone e B. B.), me qëllim që vetit ti sjell fitim pasuror të kundërligjshëm, ka shfrytëzuar në mënyrë të paautorizuar energjinë elektrike- në kundërshtim me rregullat dhe kushtet e përgjithshme për furnizim me energji, ashtu qe mbrapa njehsorit elektrik nr.62226579 përmes kabllos është lidhur direkt në rrjetin elektrik dhe ka montuar ndërprerësin 1,0,2 me çka ka anashkaluar dhe penguar regjistrimin e shpenzimit të energjisë elektrike, me ç ‘rast të dëmtuarës KEDS në Gjakovë i ka shkaktuar dëm material në vlerë prej 1.572.01 euro

Gjykata gjendjen e këtillë faktike e ka vërtetuar nga vet pranimi i fajësisë nga i akuzuari, i cili në shqyrtimin fillestar vullnetarisht ka pranuar fajësinë, për shkak të cilës gjykata nuk ka administruar provat, gjykata ka ardhur në përfundim se pranimi i fajësisë nga i akuzuari është bërë në pajtim me nenin 248 të KPP-së. Gjatë pranimit të fajësisë gjyqtarja e vetme gjykues konstatoi se i akuzuari ka kuptuar natyrën dhe pasojat e pranimit të fajit, pranimi është bërë vullnetarisht nga i akuzuari, pranimi i fajit mbështetet në faktet e çështjet që përmban aktakuza, në materialet e prezantuara nga Prokurori i shtetit dhe çdo provë tjetër dhe se aktakuza nuk përmban asnjë shkelje të qartë ligjore ose gabime faktike.

Gjykata nga të cekurat më lartë ka ardhur në përfundim se në veprimet e të akuzuarit formohen të gjitha elementet e qenies së veprës penale të përshkruar si në shqiptim të këtij aktgjykimi dhe për këtë ka vendosur që të akuzuarin të shpall fajtor dhe të gjykojë në bazë të ligjit, e më parë duke vërtetuar përgjegjësinë penale juridike të tij.

Me rastin e marrjes së vendimit mbi dënimin ndaj të akuzuarit gjykata vlerësoi të gjitha rrethanat në kuptim të dispozitave të nenit 73 të KPP-së të cilat ndikojnë në caktimin e llojit dhe lartësisë së dënimit, prej rrethanave lehtësuese gjykata ka vlerësuar rrethanat personale të akuzuarit: gjendjen e tij të dobët ekonomike, është i papunë, në gjendje të vështirë ekonomike jeton më pension të veteranit të luftës, pranimin e fajësisë, pendimin e tij dhe premtimin se në të ardhmen nuk do të kryejë vepra penale, e sidomos faktin se për herë të parë ndeshet me ligjin, kështu që duke mos gjetur rrethana rënduese gjykata ka ardhur në përfundim se me dënim me burgim në kohëzgjatje prej **3 (tre) muajve**, dhe dënim me gjobë në shumë prej **100 (njëqind)Euro**, të cilat dënime nuk do të ekzekutohen nëse i akuzuari brenda kohës së verifikimit në afatin prej **1 (një) viti**, nuk kryen ndonjë vepër tjetër penale, do të arrihet efekti dhe qëllimi i tij nga neni 41 dhe 50 i KPRK-së dhe ky dënim i tillë i shqiptuar sipas bindjes së gjykatës është në proporcion me veprën penale të kryer dhe me rrethanat personale të cilat i posedon i akuzuari.

Vendimi mbi shpenzimet e procedurës penale në emër të paushallit gjyqësor është marrë konform nenit 450 par.1 dhe 2 nën par.2.6 lidhur me nenin 453 par.1. të KPP-së.

Vendimi për udhëzimin e palës së dëmtuar në kontest civil, për realizimin e kërkesës pasurore juridike, është marrë bazuar në nenin 463 par.2 të KPPK-ës.

Me sa u tha më lartë u vendos si në dispozitiv të këtij aktgjykimi, konform nenit 365 të KPP-së.

GJYKATA THEMELORE NË GJAKOVË
- Departamenti i përgjithshëm -
P.nr.213/15, me datë 21.04.2016

Procesmbajtësja,
Lamije Kuqi

Gjyqtarja e vetme gjykuese,
Diana Sina

UDHËZIMI JURIDIK: Kundër këtij aktgjykimi është e lejuar ankesa në afat prej 15 ditësh pas marrjes së aktgjykimit, në Gjykatën e Apelit të Kosovës në Prishtinë, nëpërmjet kësaj Gjykate.